

ADYAYA I

PURWAKA

1.1 Dadalan Pikobet

Pendidikan sajeroning aab jagate sekadi mangkin madue lelampahan sane mabuat pisan antuk nincapang tata titi maparilaksana iraga soang-soang, taler pendidikan prasida kabaos parikrama anggen ngrereh pangweruh sane patut kalaksanayang antuk bekel iraga rikalaning ngemargiang swadharma ring krama. Sekadi kawigunan pendidikan nasional manut ring *Undang-Undang Sistem Pendidikan Nasional 2003 pasal 3* maosang kawigunan *pendidikan nasional* inggih punika “*mengembangkan kemampuan dan membentuk watak serta peradaban bangsa yang bermartabat dalam rangka mencerdaskan kehidupan bangsa*”. Dadosnyane ring teges kawigunan punika, pendidikan sepatutnyane madue indik pangrancana pamlajahan inggih punika kurikulum pendidikan pinaka jalaran sajeroning ngemargiang peplajahan mangdane pamargin ring pamlajahan parasida mamargi becik, runut saha ngamolihang tatujon sane kaaptiang nganutin napi sane pinaka tetujon ring sajeroning kawigunan pendidikan nasional.

Sekadi panglimbak kurikulum pendidikan sane wenten ring Indonesia, mabuat pisan ring sajeroning tata titi pemargin peplajahan sane jagi kalaksanayang. Sekadi ring tahun ajaran anyar 2022/2023 pemerintah ngemargiang indik kurikulum anyar sane prasida mabuat pemargin peplajahan ring sekolah prasida nincap sekadi sane dumunan inggih punika Kurikulum Merdeka. Manut Kemdikbud RI (2022), maosang Kurikulum Merdeka inggih

punika kurikulum sane wangun peplajahannyane *intrakurikuler* sane nenten kaiket antuk lelintihan tata titi peplajahan (*bebas*), mangdane sisia madue akeh galah antuk nguratiang papineh peplajahan tur mrasidayang ngemargiang kawagedan sane wenten ring angga soang-soang sisia nganutin kabisan sisia . Kurikulum Merdeka puniki nenten lempas saking Kurikulum 2013, santukan Kurikulum Merdeka puniki embas saking Kurikulum 2013. Nanging ring Kurikulum Merdeka puniki makehan peplajahannyane ngemargiang indik peplajahan sane ngraga, nudut kayun, waged, bakti majeng ring guru pengajian, tur saling mapitulung utawi kebaos *profil pelajar* Pancasila sane mabuat napi sane kaaptiang ring tetujon pendidikan inggih punika nincapang tata titi maparilaksana sane becik tur ngelimbakang kawagedan *kompentensi* angga sisia nganutin kabisan sisia. Nanging nyingakin tata cara peplajahan ring Kurikulum Merdeka, pastika sisia musti madue kemulan antuk nyalanang peplajahan sane ngemargiang *profil pelajar* Pancasila. Kemulan sane pinih utama sane sisia sayagayang inggih punika waged ri sajeroning mabebaosan, santukan kawagedan mabebaosan puniki dados kemulan sisia nyalanang peplajahan sareng guru lan sawitra ring kelas tur mawentuk napi sane pinaka panuntun ring *profil pelajar* Pancasila inggih punika ngraga, nudut kayun, waged, bakti majeng ring guru pengajian, tur saling mapitulung.

Manut Asmani (2017: 22) mapenampen indik kawagedan mabebaosan pinaka bantang mesadu ajeng iraga majeng ring anak lianan sane wenten ring wewidangan parikraman lan sepatutnyane punika limbakang tur mauruk mangdane prasida ngemolihang kawagedan lan kaweruhan ri sajeroning mabebaosan. Nanging mangda nincapang indik kawagedan mabebaosan, punika musti wenten sarat antuk melajahin mabebaosan marupa piranti inggih punika basa. Basa inggih punika sarana utawi piranti sane keanggen mabebaosan ring sajeroning kauripan para janane. Kawentenan

mabasa punika sampun kaplajahin mawit saking wawu embas nyantos mangkin. Ring kawentenan mabasa punika para janane ngawitin melajah mirengang basa, wusan punika ngelantur ring melajah mabebaosan sane peplajahan punika prasida kapolihang antuk ngewacen miwah nyurat. Ring Bali puniki wenten makudang-kudang basa sane sampun ngelimbak ring wewidangan soang-soang, utamannyane basa sane kaanggen ring wawengkon Bali inggih punika basa Bali.

Basa Bali pinaka sinalih tunggil basa daerah ring Indonesia sane kasub miwah kaanggen ring paiketan mabebaosan sane *lisan* miwah *tulis* olih krama Bali. Basa Bali pinaka basa ibu sane patut karesepin olih alit-alit sekadi mangkin sane basanyane punika sampun kapolihang ring keluarga. Nanging nyingakin kawentenan aab sakadi mangkin kawentenan basa sayan ngelimbak. Sekadi sane sampun ketelatarang, basa kaanggen sarana utawi piranti mabebaosan, naging pangurati alit-alit utawi sisia sane mangkin utamannyane ri kala nganggen basa Bali punika kanton kirang. Punika mawinan para sisia jekeh mabebaosan nganggen basa Bali. Antuk nganggen ngurukang kawagedan sisia mabebaosan, punika musti kapelajahin malih antuk dasar anggen melajah mabebaosan inggih punika mawit saking seneng ngawacen sastra. Akeh sastra-sastra Bali sane sandang kaanggen jalaran malajah mabebaosan, sekadi mapidarta, madharma wacana, taler masatua Bali anggen dasar ring peplajahan alit-alite. Antuk punika ring tetilikan, sajeroning nincapang pamlajahan mabebaosan panilik pacang nganggen kriya sastra tutur inggih punika satua Bali antuk jalaran malajah mabebaosan. Manut Suripan Sadi Hutomo (1991: 27), maosang satua inggih punika pupulan lengkara sane nyeritayang kahuripan saking pengawit ngantos puput. Satua ngeranjing kriya sastra Bali purwa (*tradisional*) sane marupa gancaran, inggih punika silih sinunggil *karya sastra* sane marupa kekawin utawi *karangan* sane bebas, nenten kabanda (*diatur*) antuk uger-uger. Punika mawinang kawentenan satua Bali

puniki kaanggen panilik anggen ngurukang sisia sajeroning malajah mabebaosan. Napi malih kawentenan basa ring daging satua punika kantun nganggen basa bali sane lumbrah, sane mawinang sisia punika pacang elah tur dangan sajeroning malajah mabebaosan nganggen basa Bali.

Sekadi praktiaksa sane kamargiang panilik sadurung nglaksanayang tetilikan puniki ring SMP Negeri 3 Singaraja sane magenah ring Jalan Pulau Kalimantan No. 01, Kampung Baru, Kecamatan Buleleng, Kabupaten Buleleng, Bali. Wenten pikobet sane kapanggih ring peplajahan basa Bali utamannyane ring peplajahan mabebaosan. Punika mawinan panilik meled nilikin kaweruhan masatua Bali ring SMP Negeri 3 Singaraja kelas VII B pinaka dasar anggen melajah mabebaosan. Napi malih ring sisia kapanggih makudang-kudang pikobet ring peplajahan masatua Bali, sekadi wenten sisianyane seneng melajahin satua Bali nanging wenten sane nenten seneng ngewacen satua. Napi malih peplajahan masatua Bali puniki sampun katlatarang ring *Alur Tujuan Pembelajaran (ATP)* basa Bali, ngeninin indik *KD* sane patut kalaksanayang, minakadi “sisia prasida maosang *gagasan*, *pikayunan/perasaan* majalaran antuk masatua”. Nanging kasujatiannyane akeh sisia sane durung waged mabasa Bali utawi masatua Bali. Yening sisia durung waged mabasa Bali antuk dasar malajah masatua Bali, pastika sisia meweh antuk melajahang raga ring mabebaosan. Manggihin pikobet sekadi puniki, guru sepatutnyane ngaryanin piranti mangda peplajahan ring kelas ngulangunin tur peplajahan prasida mamargi antar. Yening sisia dangan melajahin *materi* sane kaicen antuk piranti sane dangan karesepin olih sisia, pastika sisia prasida gelis ngeresepin indik *materi* peplajahan sane kaicen olih guru. Antuk pikobet punika panilik ngaptiang mangda guru prasida ngawigunayang piranti marupa *media* sane aluh kapelajahin olih sisia inggih punika *Media Wall Chart*.

Manut Erlin (2016: 51), maosang *Media Wall Chart* inggih punika piranti (*media*)

peplajahan *visual* sane marupa *gambar*, *denah*, *bagan*, utawi *skema* sane kasusun antuk *sistematis (berurutan)* saking pengawit ngantos puput tur ngemetuang indik tetujon sane napi kaaptiang ring *media* peplajahan punika. *Media Wall Chart* kaaptiang prasida ngelimbakang pikoneh para sisia sane nenten urati kapining peplajahan sane kemargiang ring kelas, santukan daging ring *media* puniki abra utawi menarik sane prasida nudut kayun sisia sajeroning peplajahan basa Bali. Abra utawi *menarik* ring sajeroning *media* puniki inggih punika ring daging *media* punika wenten gegambaran sane gegambarannyane punika marupa *gambar karikartun* sane prasida kaadungang nganutin gambar kartun sane kasenengin olih sisia. Taler ring daging gegambaran ring *Media Wall Chart* wenten sekancan indik pamiteges utawi *ilustarsi* nganutin pewartekan pragina sane ngawinang sisia pacang dangan antuk ngeresepin indik peplajahan sane kaicen olih guru antuk wantuan ring *Media Wall Chart* . Sajeroning daging ring *media* peplajahan puniki sane abra utawi *menarik*, ring *Media Wall Chart* puniki madue kaluwihan sane becik anggen piranti ngemargiang pamlajahan. Manut Erlin, (2016: 53) kaluwihan *Media Wall Chart* ri sajeroning anggen ngamargiang pamlajahan ring kelas inggih punika sisia prasida ngwadarang pikayun manahnyane sajeroning sisia punika nilikin indik gambar ring *Media Wall Chart* antuk melajah ngwadarang pikayun antuk mabebaosan taler kawagedan sisia ri sajeroning *ngolah* utawi nyusun *kosakata* lengkara sane mabasa Bali prasida nincap. Napi malih ring ngemargiang *Media Wall Chart* niki prasida kamargiang ring samian *model* peplajahan, santukan wentuk ring *media* punika masifat *fleksibel* lan nenten jangkeh. Dadosnyane pamargin pamelajahan masatua ring sisia kelas VII B SMP Negeri 3 Singaraja pacang nganggen *Media Wall Chart* puniki taler panilik ngaptiang sajeroning ngemargiang *Media Wall Chart* ring peplajahan masatua Bali sisia prasida uning indik tata cara masatua sane becik nganutin tata titi masatua, nincapang

kawagedan sisia masatua Bali, tur ngwantu sisia ring malajah mabebaosan.

Sajeroning ngamargiang tetilikan, patut maduwe sasuluh angge penyanding ri kala ngamargiang tetilikan. Wenten kalih tetilikan asoroh sane kaanggen sesuluh olih panilik saha kaanggen dasar utawi tetimbangan. Kapartama tetilikan saking Ni Wayan Mahayanti (2016) sane mamurda “Piranti *audio visual* gending *pop* Bali anggen nincapang malajah nyurat satua bawak kelas X AP2 ring SMK Negeri 1 Seririt”. Tetilikan puniki madue tetujon nincapang kawagedan sisia malajah nyurat satua bawak nganggen piranti *audio visual* gending *pop* Bali. Tetilikan asoroh kaping kalih saking Putu Riastari (2019) sane mamurda “Piranti *audio visual* kaanggen nincapang kaweruhan masatua ring sisia kelas V SD Negeri 2 Bila”. Tetilikan puniki madue tetujon nincapang kaweruhan sisia masatua antuk piranti *audio visual*. Saking tetilikan sane katelatarang prasida kacutetang inggih punika piranti *audio visual* sane kaanggen, prasida nincapang kawagedan sisia melajah masatua. Sajeroning kalih tetilikan punika madue pabinayan sareng tetilikan sane pacang kamargiang, minakadi ring *media* peplajahan, jejering, miwah penandang tetilikan sane kaanggen inggih punika ngawigunayang *Media Wall Chart* sajeroning malajah masatua Bali ring sisia kelas VII B SMP Negeri 3 Singaraja. Santukan panglaksana *Media Wall Chart* ring peplajahan masatua durung wenten sane nilikin, nika mawinan *Media Wall Chart* kaanggen ring peplajahan masatua Bali ring SMP Negeri 3 Singaraja.

Malarapan antuk dadalan pikobet sane sampun katelatarang ring ajeng, kawentenan *Media Wall Chart* dahat mabuat pisan anggen nincapang kawagedan sisia sajeroning masatua Bali pinaka anggen dasar melajah mabebaosan saha prasida ngwantu para guru sajeroning ngajahin masatua Bali. Mawinan punika panilik meled ngelaksanayang tetilikan sane mamurda “Nincapang Kawagedan Sisia Masatua Bali Antuk *Media Wall Chart* Ring Kelas VII B SMP Negeri 3 Singaraja”

1.2 Ngrereh Pikobet

Sajeroning tetilikan puniki, panilik ngrereh makudang-kudang pikobet sane mapaiketan sareng dadalan pikobet sane sampun kabahbahang ring ajeng. Inggih punika pamlajahan basa Bali utamanipun ring kawagedan sisia masatua Bali ring kelas VII B SMP Negeri 3 Singaraja. Sane dados pikobet kawagedan sisia masatua Bali, inggih punika (1) Guru durung *maksimal* nganggen *teknik* miwah sarana pamlajahan, inggih punika ri kala ngicen pamlajahan masatua Bali guru wantah nganggen piranti marupa buku paket sane ngawinang sisia nenten madue gambaran sekadi napi tata cara maktayang satua sane becik, (2) Guru wantah nganggen *metode konvensional*, inggih punika ri kala ngicen pamlajahan guru wantah nelatarang materi nganggen *metode ceramah* punika mawinang sisia kirang midap ngresepang pamlajahan saking guru, (3) Guru kirang nuntun sisia ri kala pamargin pamlajahan masatua Bali inggih punika guru nenten ngicen imba-imba sapunapi tata cara maktayang satua sane becik tur manut, (4) Sisia kanton marasa meweh antuk ngemargiang pamlajahan kawagedan masatua Bali, santukan guru nenten ngicen indik tata cara maktayang satua sane becik tur manut.

1.3 Ngwatesin Pikobet

Sajeroning tetilikan sane jagi kalaksanayang, panilik nureksain malih pikobet sane sampun karereh. Pikobet punika kawatesin santukan wenten makudang-kudang parindikan minakadi, tetilikan kabanda antuk galah, ngicen *peluang* majeng ring panilik siosan mangda nyangkepin saha ngamargiang tetilikan manut kaweruhan widyanyane. Pikobet sane kawatesin inggih punika (1) Pamargin pamlajahan masatua Bali sisia kelas VII B SMP Negeri 3 Singaraja rikala ngawigunayang *Media Wall Chart*, (2) Pikolih kawagedan masatua Bali ring sisia kelas VII B SMP Negeri 3 Singaraja ri kala ngawigunayang *Media Wall Chart*, (3) Panampen sisia kelas VII B

SMP Negeri 3 Singaraja ring kawagedan masatua Bali nganggen *Media Wall Chart*.

1.4 Bantang Pikobet

Malarapan antuk dadalan pikobet ring ajeng, prasida karincikan bantang pikobet, inggih punika

1. Sapunapi pamargin pamelajahan masatua sisia kelas VII B SMP Negeri 3 Singaraja rikala ngawigunayang *Media Wall Chart*?
2. Sapunapi pikolih kawagedan masatua sisia kelas VII B SMP Negeri 3 Singaraja rikala ngawigunayang *Media Wall Chart*?
3. Sapunapi penampem sisia kelas VII B SMP Negeri 3 Singaraja rikala malajah masatua nganggen *Media Wall Chart* ?

1.5 Tetujon Tetilikan

Manut bantang pikobet sane sampun katelatarang ring ajeng, kapolihang tetujon sane kaaptiang ring tetilikan puniki, inggih punika

1. Mangda uning sapunapi pamargin pamelajahan masatua sisia kelas VII B SMP Negeri 3 Singaraja rikala ngawigunayang *Media Wall Chart*.
2. Mangda uning pikolih kawagedan masatua sisia kelas VII B SMP Negeri 3 Singaraja rikala ngawigunayang *Media Wall Chart*.
3. Mangda prasida nelatarang indik penampem sisia kelas VII B SMP Negeri 3 Singaraja rikala malajah masatua nganggen *Media Wall Chart*.

1.6 Kawigunan Tetilikan

Kawigunan ring tetilikan puniki ka kepah dados kalih inggih punika kawigunan pamucuk miwah kawigunan panglimbak. Kalih kawigunan punika kasinahang ring sor.

1.6.1 Kawigunan Pamucuk

Tetilikan puniki prasida ngicenin kaweruhan indik ngemargiang piranti utawi *media* peplajahan sane kaanggen ring peplajahan basa Bali utamannyane indik peplajahan masatua Bali.

1.6.2 Kawigunan Panglimbak

Sajeroning tetilikan puniki, kawigunan panglimbak prasida macihna ri kala sepat siku-siku sane kaanggen pacang katelebang. Kawigunan panglimbak ring tetilikan puniki sekadi ring sor:

a. Majeng ring sisia

Tetilikan puniki prasida ngwantu para sisia ri kala melajah masatua Bali tur prasida nincapang kawagedannyane ri kala masatua Bali nganggen *Media Wall Chart*

b. Majeng ring guru

Tetilikan puniki kaaptiang prasida ngwewehin kaweruhan guru pangajian rikala ngamargiang piranti utawi *media* sane wenten tur ngawigunayang tata cara guru mautsaha nincapang kaweruhan masatua rikalaning masatua Bali.

c. Majeng ring panilik

Tetilikan puniki kaaptiang prasida kaanggen dasar majeng ring panilik pinaka calon guru ri kala ngajahin masatua Bali, saha prasida nincapang kawagedan panilik ri sajeroning nganggen piranti utawi *media* sane kasinayang nganutin *karakteristik* sisia.

d. Majeng ring panilik lianan

Pikolih tetilikan puniki prasida anggen dasar yening wenten panilik sane jagi nilikin pangalimbak pamalajahan masatua Bali nganggen sarana pamalajahan.